

撤命甲騎武卒天丁風火齊戰伐邪校精上
威六天下攝魔靈既威既攝萬凶滅形神戈
電掃森妖无生仙皇秉節有令敢停拒節連
令是誅是刑各敬各慎保茲黃寧九天告命
萬神敬聽兆若夜行畏恐心震意怯或惡夢
之時魔鬼試人犯真干氣欲病害人者急行
玉帝衛靈之法兆當心存至道求濟於帝方
北向叩齒三十六通閉氣密咒畢又叩齒如
上十過咽液十過於是毒惡消摧伏魔伏滅七
神纏綿太一鑑攝萬靈衛真外感凶氣亦可
日日誦習振響誦念坐卧隨意以塞百邪之
來試閉毒鬼之凶跡每當卧寢亦可誦之令
人神安意明辟夢除厭消諸毒毒使終身不
恐誦習之日不復北向閉氣也所以閉氣密
咒者謂鬼魔已試其左右毒精已干其神室
故救靈命真以收其兇惡耳而寢卧之咒不
復同之於此法也

上清高上滅魔王帝神慧玉清隱書

上清高上滅魔王帝神慧玉清隱書經 卷三
太微天帝君間居於明霞之上瓊闕之內金
華之房合變冥樞蕭朗上契曲寢瑤室時宴
龍山清齋三年乃命太素三元上皇五賢之
賓撤落萬靈理召千真九天齊陳八帝停輪
披朱見於玉戶陰甲列於瓊門爰有九皇上
真上元禁君超玉虛之天啟五真之房帶逸
錄之符乘三素之辮上詣玉清太微天帝君
顯靈蓋而後乘焉是時玄始映明天元敷陳
河海靜波八風散煙慶雲接於龍軒景浮揚
於九玄金仙素越大帥仗幡天丁前驅高鋒
厲天九靈啓路四明扶輪飛旌萬陰羅騎億
千躡躅於瓊闕之下揚華於明霞之巔靈儀
闡備莫不畢陳於是太微天帝君方復曲宴
瓊室重誦洞章歌紫虛之靈辭瓊微音於七
玄于時乃命太微上真勅使羣靈整甲齊鋒
乃登八瓊玉輦駕玄景之暉太霞部靈引日
俠月七晨合明五星驅除火甲揚精八素啓
輿元剛衛兵羽蓋停空萬騎相傾毒龍翼軒
飛煙繞軒戴玄上之華幡煥流金之火鈴五

震陳曜六度休明撫九華之鳴鐘打碧鼓之
玄英撞金折玉叩漱拍瓊龍吟虎嘯鸞舞鳳
鳴八音同和萬律齊聲雲璈絕玄天女羅箏
法響時奏續節上呈天鈞四陳廣樂虛庭神
虎仰號天獸羅兵逆鱗四快振豪奮形銜刀
割魔揮劍捕靈伺六天之凶夫斬山嶽之邪
精羽騎浮空神鋒曜明揮輪玉宇揚華上清
望雲景而御輦遂傾蓋於霞城既至良久於
是上皇玉帝君乃命玄羽玉即太保真人出
迎太微天帝君徐引使前遂眈於瓊房焉太
微天帝君乃稽首伏於窻軒之下進拜於帝
皇之机憑瓊顏而妙感仰靈眸而陳辭曰
賤臣幸化重悟疑玄得司帝位領括羣真浪
虛津於七覺遂鳴玉於霄上希清玄之神塗
想玉虛之神王實亦妙眇於玄流奏冥心於
遐方而天尊高秀靈蓋顯照垂觀下流已弘
大恩矣於是
上皇玉帝君乃推机偃詠虛晚太空吟玉清
之隱書歌元景之靈章玉音遐臻清微瓊振
其辭曰

上景發晨暉金霄鬱紫清三素曜瓊扉玄上
昭虛靈手振青林華迴蓋太无庭寢宴願綠
房飛步秀玉京提携朱景玉長煙亂虛管玄
歸自可保何以恣元生四王宅誰身變分豈
一形欵欵推妙品混爾至氣明於是

玉帝吟歌畢乃命太微天帝君使坐引萬靈
於房軒散華香於玉宇陳天鈞之廣樂響靈
音於八海振冥波於天外鼓扇乘風千神羽
衛方酌玉爵酌於瓊華之房九英集薦素實
丹方隱芝結饜鳳祖月漿玉攝重奏玄羽運
觴流達於八瓊之室曲宴於九琳之堂於是
上皇玉帝君方凝神遐想高詠絕玄忽然而
歎曰上契玄範通達冲微亦深矣我子既司
帝位受事玉虛飛仙朝於金闕四明輔於輪
側遐時空山領括天歡應和絕唱摠讚妙慧
誠宜極觀幽文冲契上法高會秀感其勉之
乎乃命上皇太老真人開瓊珠之窟出玉清
隱書隱玄羽經以傳太微天帝君於是帝君
下席稽辭於上皇之前再拜受書出付太微
上真羽玄玉郎以授諸上清真人及太素三

元高上玉賢之寶又帝君領括度天試觀十
方諸有宿命之人真仙之會及有帝簡金書
百玉錄籍之名者乃得授傳之耳侍書玉童
玉女各四十五人主司有經者之身紀罪於
司命紀過於三元審慎者則享福漏泄者則
禍經苦樂立應於七祖罪福交會於當年三
天司察奏之帝君書罪錄過无不上聞善惡
違情可不慎焉

上皇玉慧玉清隱書者乃高上之訣辭玉帝
之靈章也一名洞景金玄隱玄羽經玉帝君
藏經於景雲之間瓊霞之房封以丹藥之篋
闕以雲錦之囊主以太老上真侍以玄景玉
童使七百年中得傳三人自非真仙之名帝
圖玉錄者不得聞見此經得見之者飛仙上
清傳授之法皆五老授圖太一試觀故能攝
生十方領會洞天啓普丹膏飲血為盟先齋
七百日然後傳之盟用青錦三十尺金環兩
雙所以重誓冥科崇約帝君上登玉清累祖
胎仙漏泄寶文七世被殃繫魂鬼於死尸之
下伐年命於五道之津三官考毒已無仙其

切身殊於水火險澁過於復水可不慎哉可
不慎哉

玉清隱書金玄羽經皆虛皇之寶書玉帝所
秘藏三天司察紀諸違慢之罪兆登齋之日
侍經玉童玉女上聞帝君靈音既震則太一

鑒試帝尊下觀太老侍側羽仙司真夫兆當
清齋入室淨服燒香唯精唯專然後乃十轉
誦經耳

洞景金玄玉清隱書

玄玄虛上四靈敷篇玉慧散魔六度休陳高
會三元朝宴九真萬靈受事玉帝隱玄九和
百會參乘法輪流浪高軒立景上元道達无
方體一凝神冲化合變七道齊分保生玉清
道還虛津陰察萬兆括領洞天魏魏德宇哉
哉高尊雙景翼靈四映二玄玉道交煥萬範
流金周落天度七變九旋觀化太空飛步玉
宸清波遠鏡道悟上真精微太虛高唱絕玄
於是八素同期俱朝玉清徽命太微徵召萬
靈三元奏簡五老會庭高真森羅金仙殊形
羽裙玉袂錦帔流鈴綠霞被素玉室發精音

響太和萬唱絕冥靈光八暉七氣混生公子
合變帝一凝形妙詠神慧玉道隱經靈音瓊
散玄響繪呈五皇命駕高秀皇庭玄上招仙
王帝之旌五嶽神王輔輪四明二道方塗理
會上仙洞天高觀妙景雲天扉廓散靈葉
開明騰舞太无七神常生雙宴空洞遊夢上
清精感遠暢道合无名十絕交和二象虛停
攝元理氣萬化潭成錄簡雲房寶籍高靈澄
神紫虛命胡可傾或乃神元妙接逸觀常流
四玄總暎飛光電幽日華雙運紫庭照無道
悟上真七靈同符神機頓速八皇定書名奏
帝堂羽籍太无身宴錄房飛行玉虛南宮受
仙七元反胎寢暎高瓊變升神衝霄歌玄唱
帝賓同居保益玄歸丹皇運珠上一赤子凝
天伯无妙眇雲景鬱鬱雲丘手排金扉身荷
玉符朱霄霞煥八光仰投體矯冥真攝生萬
流保景金晨長宴玉州於是罪滅三塗靈吹
九辰納真紫房玉皇攜仙保會絳宮逸宅丹
玄十轉五迴靈震萬原香風八披惡魔絕煙
萬萬千十來對帝前仙皇告符道達三真瓊

音上充七世无間令我飛仙名遷玉門三氣
纏綿九竟已分帝一變景萬化亦臻七度上
徇三光暎真對滅五道伐破胞根雙皇陝守
把符十玄玉籍已明福盈龍泉陵梵獲昌五
氣合廷恭乘太一同昇帝軒并命公子奉籍
七神黃錄刻名握節上遷飛暎玉華煥落靈
元滅魔散禍長閉帝宮玄氣四霏大混虛冲
靈飛外輔六丁注中雲行雨施流布三宮九
皇下視上策隱龍月母同軒徊蓋帝幄披朱
中羽鳴鈴華峯越出地戶泉曲之梁五老合
符相金帝鄉俱過水火混一紫房七間受仙
朝會玉堂九曜同生五華運光八氣慶合十
絕宇張上帝歡熙玄母常康九靈同期左弼
右卿太无結暎萬氣混并上登洞房徊合玉
清神風扇扉紫霞綠經營洞靈機九和百明
神對金霄逸羽龍京景福萬塗七祖順生各
保南仙莫不胎嬰九合三離素華繞形福景
日王併羽月靈太一名魔九天枝精技迴死
積越度仙庭司命奏籍帝一混并三元把符
七神虛營穢氣紛紛血尸沉零絕根反胎萬

氣以成太素錄圖金仙同軒大福纏綿累支
同榮寶藏秀華三關霄清白氣徘徊凝鬱珠
瓊飛液玉晨長保劫齡五暉纏曜七門受明
神符散慧理氣攝靈右徊洞陽左攜元英公
子奉籍內守桃康玄母抱圖五神黃寧胞根
八解皇老刻名九結披散五毒攝精拔出三
界反胎仙庭七元解羅累相受生寶錄太无
俱濟神營六府煥奕金書羽經世為真仙披
落錦青帝師纏綿合景玉清散香龍憲玄合
五城足躡景衢手排四明八暉九鍊飛步雲
京領會六淵刻名八瓊五通七合三氣乃并
萬條重華世保仙靈把持玉符身昇羽庭徊
風合化玉帝隱經長契壹運上願必成受帝
之恩上朝玉清
玉清隱書隱玄羽經一名洞景金玄玉帝所
秘藏修此之法當先行大混百神變化雌雄
及帝一上道然後乃得續行之耳此之靈章
帝皇之寶篇解七祖之德結保萬神於胎元
攝生道於十方振靈音以上充萬編既周則
身輝金展爾乃靈霞妙感俯仰雲輪鳴鈴太

霄列位上真所以俯仰殊格未行其重故也當以本命之日清齋入室燒香左右北面再拜乃心存於玉帝瓊元君求得解七玄之愆乞已神仙畢平坐誦經誦經三遍輒一過讀高上滅魔王帝神慧是夕當十轉隱經四讀帝慧也讀畢乃臨目內視夷神平氣坐卧隨意當叩齒三十通而微祝曰

五帝大慧是謂隱玄十轉四迴滅魔王真七靈同期大混五神瓊音八震上元七玄玄風散靡扇伐胞根長保胎嬰世受真仙上昇上清玉帝之軒畢又叩齒三十通咽液十過於○是百神並會五藏夷平帝君歡熙太一保生體清氣固魂柔魄寧司命定錄皇老書名人无哭已飛輪玉清胞結解散八暉同形大福纏綿七玄同榮十轉既竟心拜四方所以專妙高靈也長齋之士絕交人事體清服潔隱靜別處亦可日日誦習或可甲子之日及諸八節之日此皆上元朝宴之時不必須待本命日爾乃行事也夫十轉隱經之時皆太一監察司命定生萬靈混合帝君凝形三官會

真九房受靈是其夕也當有玄感妙應靈瑞吉祥然後八素鬱軀三元校真也

夫修此之道惟使精專存真念氣心誠苦密憂樂輒軒不忘於至道然後冥感易會法輪速昇晨登太霄飛行陰房去若乃情散萬念精誠不固形屍穢濁心无至慕犯慢靈禁動違科素者則帝君糾其罪禍敗經其軀已身无仙莫七玄更被囚魂鬼入風火年劫增其尤奉禁者靈仙犯違者身誅也

道士體不平和覺疾病之處可隱靜別室於乞神明求得解脫愆羅及七玄之罪聽得轉經存念真氣禮祝如法施行都畢乃靜身安寢自然魂胎內固三關受靈邪毒散出體夷氣手既悟之後覺身體康寧都无復痾疾矣若他人疾病有諸急難之地皆聽為轉經當先啓告神靈北向再拜說其名字於玉清瓊元君求得上解其愆及七祖之罪濟生十方身勉八難然後燒香隱誦祝請如法大福皆應身登齋入室七日轉經名曰大混百神朝會帝一解愆脫羅攝生濟厄无不受恩此玉

帝上法不可輕履屍穢及干冒淹濁三天察過罪同漏泄慎之慎之

上清高上滅魔王洞景金元玉清隱書經